

09 AUG 1999

PERSIDANGAN DEWAN RAKAMKAN TAHNIAH ATAS PELANTIKAN ADNAN

KUANTAN, 9 Ogos (Bernama) -- Dewan Undangan Negeri Pahang yang bersidang hari ini merakamkan ucapan tahniah kepada Datuk Adnan Yaakob yang dilantik sebagai Menteri Besar ke-14.

Selain itu, ucapan penghargaan dan terima kasih juga dirakamkan kepada bekas Menteri Besar Tan Sri Khalil Yaakob yang menerajui kepimpinan negeri ini selama 13 tahun dan berjaya mewujudkan pembangunan seimbang serta kemudahan prasarana di seluruh negeri.

Speaker Dewan Undangan Negeri Datuk Abdullah Kia berkata pengalaman Adnan selama sembilan tahun selaku anggota Exco kerajaan negeri lebih memudahkan beliau untuk menjalankan tugas-tugas Menteri Besar.

Katanya, sejak dilantik pada 25 Mei lepas, Adnan telah memperlihatkan sifat-sifat kepimpinan dan karismanya dalam menerajui pemerintahan negeri.

Adnan, 49, diumumkan sebagai Menteri Besar Pahang menggantikan Tan Sri Khalil Yaakob yang kini Menteri Penerangan dan Setiausaha Agung Umno dalam satu rombakan kabinet yang diumumkan Perdana Menteri Datuk Seri Dr Mahathir Mohamad Mei lepas.

Persidangan dewan juga turut merakamkan ucapan tahniah kepada Anggota Dewan Undangan Negeri (ADUN) Jengka Datuk Zainal Hassan yang dilantik menganggotai Exco Kerajaan Negeri dan ADUN Kuala Pahang Datuk Abdullah Md Derus selaku Timbalan Speaker Dewan Undangan Negeri.

-- BERNAMA

ROS RHM